



Expositio Arnaldi Ossati in disputationem Jacobi Carpentarii de methodo

<https://hdl.handle.net/1874/9510>

EXPOSITIO
ARNALDI OSSATI
IN DISPUTATIONEM
Jacobi Carpentarii de
Methodo.



PARISIIS,
Apud Andream Wechelum.

1564.

2

E X P O S I T I O A R-
N A L D I O S S A T I I N
disputationem Jacobi
Carpentarii de
Methodo.

DISPUTATIO tua, Jacobe Carpentari, quod non sit unica Methodus, visa est mihi sic perscripta esse, ut cum nihil prorsus efficias, aliquid tamen efficere videri cupias. P. Ramus praceptor meus in ista quaestione rem initio accuratè proposuerat ac definiverat, ne quis falleretur: Non se de qualibet methodo quarrere, sed de ea tantum, qua artium praecipra jam inventa, jamque sigillatim judicata disponerentur & collocarentur: Hanc esse dispositionem artificiosam & perpetuam priorum artis praceptorum, quæ à natura prioribus & notioribus, ad posteriora & ignotiora natura progrediatur: ut cum eruta primùm fuerit artis materia, (quod Logice inventionis opus esse Aristoteles docuit) deinde separatim judicata & probata (quod Logice dispositionis in enuntiato & syllogismo proprium est) si requiratur ordinis ratio, primum illud sit, quod per se queat intelligi, cetera autem sine ipso nequeant: secundum, quod à primo pendeat, ab eo autem sequentia: eademque ratione tertium, quartum, quintum, & reliqua deinceps collocentur, ita ut semper natura priora & clariora praecedant, natura vero posteriora & obscuriora consequantur. Et quoniam via quæ à generalibus & universalibus, ad specialia & singularia progreditur, ea sola procedit à natura prioribus & notioribus, idcirco hanc unam, in disponendis artium praceptis, viam tenetdam esse, cum eodem Aristotele, P. Ramus profitetur. Et

ARNALDI OSSATI

hanc artis methodum unicam & singularem esse docuit maximo prorsus & certissimo argumēto, quia hæc sola via esset ad intelligentiam artium & memoriam clarissima, maximeque compendiaria: contraria autem via contrariis vitiis obstructa esset, obscuritate & prolixitate. Hanc demonstrationem P. Ramus ex Aristotele attulit, quæ firmitate veritatis, & soliditate judicii Geometricas etiam demonstrationes omnes superare videatur. Addit ad hanc tam illustrem tamque necessariam demonstrationem, auctoritatē momento gravitatis parem, omnes artes illam viam sequi voluisse, quamvis partibus omnibus non sint assequutæ. Hac una methodo, atq; isto solo dispositionis genere Grammaticam, Rheticam, Logicam, & quamlibet aliani doctrinam progredi, cōtrario prorsus nullam. Itaque sentētia P. Rami, quæ unicam artis & singularem methodum constituit, altissimis est defixa radicibus, sic ut nulla vi labefactari possit, nullis argumētis everti, nunquam dimoveri loco. Si causam requiras, intelligentiæ & memoriae profertur causa maxima: si effectum, locupletiora atque sanctiora hujuscē rei testimonia & exempla nulla requiri poterāt, quam artium ipsarum, de quarum methodo hic agitur: quæ omnes una voce clamātes testificantur, hanc unicam & singularem methodum sibi familiarem & notam esse, διότι καὶ ὅτι omnesque arculas, totumque Aristotelis μεροθήκην hic adhibitum vides. Tu quinque annos, & eo plus (ut tu ipse profiteris fol. 11. pag. 2.) magna cum cura & diligentia meditatus es hanc quæstionem de Methodo. Itaque videamus quid tanta, tamque diurna comminatione dignum contra hanc sententiam tam ἀποδεκτικῶς καὶ γεωμετρικῶς affirmatam & stabilitam afferas. Duabus & quadraginta paginis disputatio tua producēta est: in quibus nihil est quod, vel minimum, officiat lumini ac splendori duarum illarum P. Rami demonstrationum: imo verō (tanta vis est veritatis) tu ipse tandem tua ipsius voce & confessione confirmabis, quod vano & inani conatu tibi videris infirmare.

hæc

hæc omnia polliceor me suis locis expositurum: (quæ causa præscripti tituli fuit) & quidem ea moderatione animi, ut à me contumeliam nullam auditurus sis, nisi tuas in P. Ramum: quas, ut singulæ occurrerint, ita tibi, quó te ipsum facilius agnoscas, repræsentabo primum, deinde etiam refutabo. Atque ut libri tui singula momenta perpendamus, duas in partes ipsum distri-buemus. Prior nobis erit ab initio usque ad folium duodecimum, quod tu octavum notasti: Posterior inde ad finem usque. Ita enim accedit ut tui libri pars omnino dimidia nihil proflus ad quæstionem attineret, reliqua minus à quæstione esset aliena. Agedum igitur, incipiamus. Titulus libri tui est, *Disputatio de Methodo quod unica non sit, contra, &c.* At P. Ramus nusquam dixit unicam esse methodum absoluté: sed artis ordinandæ & collocandæ (cum ejus materies inventa & sigillatim judicata sit) unicam & singularem methodum esse docuit. Hac tua prima laus est, quæstionem alienam tibi fingere. Itaque mirum nō erit in tota tua disputatione te tam longè tamque vehementer aber-rasse. Procœdium tuum nihil habet cōtra P. Ramum, præter convitia impotentis animi & malevoli. Verū quid ista probra ad quæstionem de methodo artis informandæ, & probra præsertim laudis & gloriæ plena? Eum tu Regis Edictis damnatum aīs, qui tot annos, liberales artes tanta omniū bonorū utilitate & lætitia, tāta regis sui nō solū liberalitate, sed gloria profitetur? Ibi verō pudor & modestia tua fuit, cūm dicere ausus es à Senatu damnatum, quem Senatus sua sponte non solum calumniis tuis & tuorum liberavit, sed publici & honesti in Academia gymnasii præfectura exornavit? Tandemque postea in hujus, quam exprobras, tempe-statis æstu, Senatus consulto suo, & restitutionem bo-norum & quæstionem absenti decrevit, & pace consti-tuta, primum omnium in Academiam restituit: ut jam P. Ramus bonis omnibus & doctis tanto chariflimus sit, quanto tu odiosissimus esse meruisti. In eō verō

ARNALDI OSSATI

jam non modestia solūm, sed communis pene sensus
tibi defuit, doctissimorum hominum sententiis dam-
natum dicere. Doctissimos, opinor, homines intelli-
gebas tui similes, & Logica tibi pares: aut cūm, op-
pugnatis scripto quodam suo vestris sophismatis, eadē
judicij veritate & æquitate damnatus est, qua per ludi-
brium histrioniae, in scena, per te, capite obtruncatus.
Itaque ut caput illi per tuas fabulas adhuc salvum est,
sic per judicium illud fama ingenii & doctrinæ incolu-
mis & integra. Veruntamen quid judicium illud com-
memoras, cūm, te etiam consentiente, omnes ordines
Parisienſis Academiæ P. Ramo novos honores decer-
nēdos censuerint, quōd primū in causa prati publici,
salutem, deinde in conservandis privilegiis dignitatem
nobis universis procurasset? Et hujus quidem honoris
testimonium tandiu feretur, quandiu publicarum Aca-
demiarum tabularum memoria extabit. Sed valde huma-
num & æquum illud fuit, de calamitate publica & casu
privato. Enimvero si quis à latrone spoliatus apud te
conqueratur, tu, justissime judex, non latronem sup-
plicio, sed spoliatum cachinno tuo dignum judicabis.
Ecquid igitur? etiamne à P. Ramo ejulatus muliebres
hic expectasti? Deus tibi, tuisque fortunam perpetuō
secundam largiatur, aut in adversa, P. Rami animum
atque cōstantiam. Simile illud est, à maturo scilicet ac
venerando juvēne senilem ætatem exprobrari. At ista
senilis aetas si te suis vel unguibus dignum censuisset,
cheu misero tibi: jam multō viridiorem & valentio-
rem sentires, quām nescio quos nervos tuos emortuos,
per quos tibi, licet Medicinæ discipulo, valde verendū
est ne senescas unquam. Faxit tamen Deus ut aliquan-
do talis senectus, edomita juventutis tuae ferocia, tibi
possit exprobrari. Sed enim perge: voluisti hic intelligi
qualis es, nō P. Rami sententiam refellere. Duæ pro-
ximæ paginæ cōtinent Alcinoi locum, pro fundamen-
to & firmamento disputationis tuae, quōd sit triplex A-
nalysis. At locus iste si verus esset, periculum disputa-
tioni

tioni tuae potius crearet, quam adjumentum ullum afferret. Verum fallax est & captiosus, & a te ipso paulo post improbatus: Alcinousque tuus Platonicæ philosophiæ, quam pollicetur, se tam ignarum hic ostendit, quam tu te Aristoteleæ deinceps ostendes: ut cæcus & cæcum secutus meritò in eandem foveam cadant, neque mirum sit tali præceptoris discipulum talem contigisse. Sequitur deinceps folio 1. & 2. ut tu notas, sophisticum lexicon, ex tua & tui similium sophistica: quod dicatur Analysis tripliciter, primo Geometrica ab ultimis ad prima, secundo Aristotelea a primis ad ultima, tertio totius integri in particulas ultimas. Hic vero fundamenti tui valde immemor Alcinoi tui partitione valde imprudenter τῆς ἀδολεσχίας sophismate condemnas, quod antea significaveram, & duas Alcinoi posteriores Analyses in Geometricam illam primam includis. Ita non jam tibi tanta cum P. Ramo, quam cum Alcinoo tuo pugna est. Et hic mihi sophistica significationum tuarum mirabilis fuit. Qui enim Platonem Graecetotum studiose legerunt, & omnes ejus de Dialectica locos observarunt, Analyseos tamen verbum, quanvis Geometricum, quanvis Platoni familiarissimum, in Platonis libris, cum de Dialectica aliquid philosophatur, animadvertere nondum potuerunt. Tu homo ἀναλόγοις, qui vix Ficini qualemcumque versionem intelligis, dic obsecro, ubi, quo in Platonis libro legisti? Jam tertia tua Analysis a toto ad particulas, si est ut syllogismi in enuntiationes, & enuntiationum in terminos (ut Aristoteles appellat) quid a prima differet? Evidem miseret me tui, qui in eos laqueos te indueris, unde sine magna infamia expedire te nequeas. Analysis tibi ex Aristotele, que non intelligis, repetitur a Geometris. At tu, nisi tam esses ἀγεωμέτρητος, quam es ἀναλόγοις, didicisses quibus in propositionibus Euclides & Archimedes, & quomodo ad syllogismum tantum, non ad istam, de qua agitur, methodum, Analysis utantur: neque te unquam tam turpiter deridendum nobis in illa

ARNALDI OSSATI

eruditio pulvere versatis propinavisses. Sed P. Ramum calumniari, quám ab eo Logicā & Geometriam disce-re maluisti. In distinctione Geneseos par sapientia est. *Genesis* (ais) est progresio primūm à partibus ad totum integrum, deinde à formis ad genus, tertio à fine ad media & à mediis ad finem. Eandem denique in synthesis & diæresi distinctionē vis intelligi. At Logice mirifice, quid no-bis isto loco somniasti? aut à quo mercatore merces istas tam invisas, tam inauditas, aut ex qua barbarie proœctas emisti? Nominasses, saltem auctores tuos. Analysis, Genesis, Synthesis, diæresis alba tibi, an atra sit, nihil laboras: quicquid denique, & quacunque confusione fingi potest, est tibi Analysis, est Genesis, est synthesis, est diæresis: quia est à summo ad imum, aut ab imo ad summum, aut aliquo tuorum istorum modorum permistum. Hocce fundamentum disputationis tuæ nobis esse voluisti? Atqui ista sophismata tam cornuta non solùm positæ quæstionis aliena, sed falsa, & fallò auctoribus attributa, P. Rami sententiam, quod unica sit artis ordinandæ methodus, nunquam labefactabunt, nunquam loco movebunt. Verum age: jaœta sunt firmissima disputationis tuæ fundamenta: reliqua exædificatio consideretur. *His ita positis, Jam (ais) ad nostrum Thessalum veniamus.* Thessali nomen P. Ra-mo ingeniosé tibi videris affingere: & ut quondam in histrionia illa tua vetere nescio quibus aliis nominibus traducebas, ita nunc tibi nova placet actio: & cùm mil-lies Thessale, Thessale, Thessale, inclamasti, credis futu-rum, ut libri tui lectors existiment P. Rami senten-tiam, quòd unica sit artis collocandæ methodus, abs te magnificé & præclaré refutatam. At tu, qui Thessalus fuerit, nescis, nisi per adversariū Thessali, cuius scripta si extarent, collatis contrariarum sententiarū momen-tis, judicari denique posset, ultra justior & verior causa esset. Sed tamen, ut ut sit, in Thessalo convitium à Ga-lenō maximum est, quòd insolens & arrogans fuerit, quòd Arithmeticam, Geometriam, Astronomiam ne-scierit:

scierit: quorum utrumque si tibi maximē omnium con-
venire dicam, ideoq; Thessali nomen tibi tam aptum,
tibi ut retineas, jubeam: quid, obsecro te, Carpentari,
quid dicturi sunt ii, qui te bene norunt? Ego verō id nō
faciam, quippe qui tāto erga te modestior esse cupiam,
quanto tu in P. Ramum dissolutior fuisti. At tu repe-
tis etiam fol. 3. veterem illam novā academiæ calum-
niā, ex eadem illa tua histrionia, in qua, ut histrio
nescio quis Socratem Athenis, sic tu P. Ramum Lute-
tiæ in scena traduxisti. Evidem doleo te ex ea patria
natum, quæ multos huic Academiæ viros diligentes &
fructuosos, Fabros, Sylvios, Fernelios, Hortenios,
Flesselios, & jam denique Ramos aureos extulit, te, in-
quam, tuorum popularium tam dissimilem inveniri.
Ingenio aliquo natura te genuit, sed crudo & acerbo:
studium etiam quoddam adfuit, sed ambitio & æstus
animi ad magistros turbulentos te contulit. Comitia
Mathurinensia multō səpiū quām Græcorū vel Ma-
thematicorum auditoria frequentasti. Hinc morbus
quidam comitialis professioni philosophiæ, vel etiam
medicinae, valde alienus atque contrarius. Itaque ut in
comitiis quantumlibet valentem Mathematicum, vel
philosophum, tuis suffragatoribus, superare consuevi-
sti, sperasti quoque quæstionem de unica artis insti-
tuendæ methodo obtineri posse. Falleris, Carpentari,
& multō plures in ista quæstione P. Rami discipulos
offendes, qui te, si ad punctum temporis paululum tui
dissimilis esse voles, fallaci de te conceptæ opinionis
errore liberabunt. Quorum & si minimus ego sum, ta-
men valde spondeo te & tui similes, has calumnias &
fraudes sophisticas non impunē laturos esse. Verum-
enimvero tu maledicus convitiator esse pergis: Eadem
pag. P. Ramum vocas in antiquitatem cōtumeliosum,
& postea etiam veterum juratum hostem, cūm ille,
contratua & tui similiū sophismata, honorem & di-
gnitatem Hippocratis, Platonis, Aristotelis imprimis,
deinde reliquorum summis illis proximorū omni stu-

ARNALDI OSSATI

dio tueatur, eorumque sententias, ad verbum citatis locis, ostendat: tu autem Platonii & Aristotelii ea affingas, quæ ipsi cùm verbis, tum re ipsa & exemplis averfantur. Eum præterea dicas repuerascere in nugis, & in sole scere. Tu vero, Carpentari, ea conditione es, ut adhuc repuerascere non possis, qui puer esse non desieris: Cæterum nugæ sophistarum sunt, hoc est tui similium, insolentia vero unius Carpentarii propria. Sed, obsecro te, Carpentari, quid tot maledictorū tuorum sophistica ad quæstionem, quod artis informandæ methodus non sit unica? Tandem significas te haec tenus nugatum esse, neque quidquam ad rem dixisse: & quæstionem de methodo artis unica ex P. Rami constituis, contraque profiteris te non esse unicam demonstraturum. Jam Logicus videri vis, & rem propositam agere. Age igitur, quænam hic argumenta habes ad evertendam illam P. Rami sententiam? *Est* (ais folii 3. pag. 2.) *Inventio artium ut collocatio.* Esto inquam quis negat? *Et inventionis via contraria collocationis:* Esto id quoque: quid tum? non hic de inventione artium quæstio est, sed de earum jam inventarum, & sigillatim judicatarum methodica dispositione & collocatione. Et tu ipse, ut omnes intelligent te de industria sophistam esse, citas locos duos ex libro P. Rami, ubi ait se non querere quomodo res ἐπισημονικὰ sint inquirendæ, sed quomodo, cùm inventæ fuerint, collocandæ & quo ordine disponendæ. An non tu igitur sciens & prudens sophista es? Quod si te hic in methodo errare non sentis, & isto modo progredi methodicum esse putas, simul & illud tibi necessarium fatendum est, te ne umbrā quidem habere methodi: ac tibi quidvis potius agendum, quam de methodo scribendum fuisse. At nunc tandem de quæstione dices, quoniam tu ipse in eam incidisti. Imo vero octo paginas rebus alienis refertas nobis obrutes, antequam de ea verbū ullum facias. Ac statim non solum ad aliena, sed etiam ad falsa digredieris: & primum Platonis locum dicas,

fol. 4.

fol. 4. à P. Ramo methodi turbatorem appellari, & affirmas eadem religione, qua pleraq; ejusmodi toto tuo libro affirmasti. Ille verò non Platonis, sed Aristotelis potius perversé intellectum locum turbatorem videri posse dixit. Deinde exultas septem continua paginis dum ineptissimè quæris identidem, cur P. Ramus inventionem artis omiserit: & interea plerisque, eodem etiam colore, plumis surreptis ex animadversionibus, cornicula, te exornas. Sed tamen ó homo hominum doctissime, & in Logicis eruditissime, satisue hic sanuis es? P. Ramus duas Logicæ partes cum Platone & Aristotele constituit, inventionem & judicium: priorisque præceptis non sólum artium, sed omnium omnino rerum investigationem proponit. Sic Aristoteles doctrinam causarum, factorum, subjectorum, adjunctorum, & reliquorum copiosè, vel potius effusè, tradidit: nec novos præterea inveniendi locos ad artium investigationem accommodavit. Methodus autem illa, quam tu in inveniendis artibus somnias, est illa induc̄tio (de qua Ramus in loco distributionis) qua omnes artes inventas esse & Plato, & Aristoteles, & cum utroque P. Ramus profitetur. quæ ex causis, effectis, subjectis, adjunctis, dissentaneis etiam est, quia ex quatuor primis illis locis distributio partium est, & differentia: & eadē distributio est in dissentanea. quæ tam turpiter ac fœdé non ignorares, si P. Rami Dialecticam ad te conformandum meditari, quám calumniari maluisses. Vides igitur, Jacobe Carpentari, quám prudens & docta sit tota disputatio tua, nec abs te magis P. Ramum accusari, quám Aristotelem, quám quemlibet Logicæ magistrum, quám denique te ipsum, qui Logicæ magister videri vis, neque tamen in tua bella Dialectica aliam propriam artium inventionem docuisti. Accusas esse prætermissam artium inventionem, quæ amplissimè & evidētissimè demonstrata est. Neque manca hic P. Rami Logica est, ut tu clamitas, sed plena & copiosa. In illa verò disputatione de methodo si quæ-

ARNALDI OSSATI

ras cur inventionem omiserit, quis non te derideat? Quid enim? Tu ipse nonne tibi licere vis, in hoc tuo libello, de hac quæstione disputare, ut interea tamen totam Logicam non explices? Cur igitur quod tibi arrogas, idem alteri licere nonvis? Volo, inquires, hanc vestram unitatem methodi nominatim refellere: & ille, inquam, voluit istam methodorum artis multitudinem nominatim refutare. Sed haec tenus de falsa & fallaci querela tua prætermissa methodi inveniendarum artium, quæ usque ad folium octavum producta est. Ergo pergamus. Fol. 5. pag. 2. parem Logicam ostendis. P. Ramus(ais) facit exercitationis Logicæ duas partes *Analsim* & *Genesim*, quæ quia contrariæ sunt, una methodo comprehendendi non possunt. Ergo duas methodos efficiat necesse est, unam construendi artibus, alteram retexendis. Evidem quò longius progredior, eó infinitiorem sapientiam istam tuam in te deprehendo, qui non solum à quæstione aliena, sed etiam falsa semper afferas. Etenim dispositio artis quæ tot partitiones rerum cōtrariarum complectitur, an idcirco non unica est? An P. Ramus *Analsim* operis Logici alia methodo, alia *Genesim* instituit? An non unica illa in ambabus partibus & singulari utitur, descendendo à summo per media ad infima? An denique multitudinem methodorū, non unitatem sequitur? Sed hæc, quæ ad exercitationem pertinent, abs te ignorari mirum non est, qui nullam exercitationem, nullum usum amplectaris, imò omnem asperneris & rejicias: cuius si vel micam habuisses, intellectuisses qua methodo artes ipsæ dispositæ & collocatae sunt, eandem omnino methodum servari, dum ipsæ in propositis exemplis retexuntur. Sed hoc fuit insciatiæ & ignorantiae tuæ, illud vero quod sequitur, improbitatis & malitiæ, quod fol. 6. pag. 2. comminisceris, pro tua jam tibi visitata religione, totum Logicæ usum à P. Ramo ad veritatem, vel falsitatem quæstionis referri. Atqui P. Ramus in Logicis præceptis in quinquennio tuæ istius disputationis editis, quin etiam in

in eo libro de methodo, quem tu nunc oppugnas, docet usum Logicæ, etiam sine ulla quæstione, magnum esse, in tota inventionis & enunciationis per se manifesta doctrina, in tota etiam methodo : & quæstionis, id est enunciationis dubiat, Logicam explicationem (quod ad judicium ejus attinet) ad solum syllogismum referri. Hæc igitur est tua Logica, comminisci quidvis audacter, licenter affingere, & in iis tandem palmarium tui pudoris & urbanitatis ducere. At etiam hic voluisti facetus esse. Itaque *Lepidum artificium, igne de cœlo, Marathonem, Leuctra*, ut antea, *philosophie regnum, postea, palmarium, Rosci tibias, copia cornu, ardorem senilem*, id est mel & saccarum, scis à quo pharmacopola sumperis. Sed ejusmodi avicularum rostris imperi P. Ramus jampridem consuevit, neque movetur tamen. Verum, orator facetissime, de plurimis & maximis disputationis tuæ laudibus, haec mihi notabilis imprimis esse visa est, quod hac eadem pagina, ubi nostrum artificium vocas lepidum, ut nunquam ad quæstionem venias, materiam lögioris digressionis querens, umbras nescio quas sophisticarū respōsitionum tibi confingis, cum quibus Andabatarum more prælieris : & cum iis diu vehementerque luctatus, tandem quarta post pagina, te reprimis, & eloquentiam Ciceronis, Cæsare devicto, bellator acer usurpas. Sed nimis urgeo, inquis, addidisses *Commoveri videtur adolescens, sed feniſis ætas exprobra-ta repugnabat*. O lepidum artificium tuum, Jacobe Carpentari, & quidem πυρογένετα appositum, præfertim continuo post citatum ex animadversionibus Aristoteleis eum locum, qui tuæ te imperitiæ imprimis admonere poterat, & cuius splendor tantus est, ut sordes tuarum nugarum inde mihi nonnihil splendescere viderentur. Sed video quid volueris. Quoniam ad dimidium tui libri jam perventum erat, voluisti nobis, bonus scilicet orator, movere risum, quo paululum recreati ad alteram partem libelli tui veniremus alacriores. Sed tamen homo πυρογένετε non solum

ARNALDI OSSATI

λογικώτατη, tua haec tenus tam prolixis nugis & mendaciis referta disputatio, quid ad quæstionem tibi à te ipso propositam attinet? Quæstio est utrum unica sit artis ordinandæ methodus. *P. Ramus*, ais fallō, sed tamen ais, prætermisit inventionem artim. Quid tum? inquam: utrum idcirco methodus collocandæ artis unica non erit? qna figura syllogismi, quo figuræ modo id abs te concluditur? O homo tui nominis (si tamen ullum habes) prodige & parum sollicite, quid in posterum homines de tua ista tam modesta tamque ingenuosa sapientia dicturi sunt? Ponis quæstionem, & ab ea repente & tam longe digrederis. Doctrinæ methodus, de qua hic quæstio est, digressionem omnem ut sophisticam aversatur: Tu pro tuis multiplicibus methodis, unam aliquam tenuisti, quæ tibi permitteret vixinti paginas ad quæstionem nihil attinentes balbutire & ineptire.

Sed haec tenus ad res alienas in contumeliis & probbris, in disputationibus nugatoriis, in sophistica prætermissa invective accusatione tibi responsum sit: quæ primæ partis mihi initio propositæ expoñitio altera fuit. Sequitur ab octavo folio disputationis tua reliqua, non magis quidem vera, sed tamen minus aliena: ubi primum agnoscere videris sophisma tuum, cùm dicis te velle de quæstione dicere, quod non sit unica methodus artis collocandæ. Jam bona fide tecum paciscar: (ais) Bene est, inquam ego: ostendis enim te nihil adhuc bona fide dixisse: cùm nunc primum bona fide paciscaris. Verum age: dupli argumento, ut dictum est, tanquam adamantino quodam fundamento *P. Rami* sententia nititur, Aristotelica illa demonstratione, & artium omnium inductione: videamus primum quomodo tu Aristotelem oppugnes, deinde de *P. Ramo* videbimus. Erigite igitur animos, qui ista legitis, & machinas oppugnatoris tam vehementis & acris adversus unicam artis methodum ab Aristotele propositā, à *P. Romo* illustratam & vindicatam attendite. Hie

aries

aries fossis substratis, aggere completo ad muros admovetur, seriōque jam pugnatur. Quid igitur Aristoteles aberravit, cum docuit in arte ordinanda à generalibus ad specialia tantum procedendum esse, non contra à specialibus ad generalia? Quid P. Ramus offendit, cum hanc unicam & singularem methodū adversus omnes hominum errores vindicavit? Dic Jacobus Carpentari, cur non est unica artis collocanda methodus? Unum (ais) sicut & multa dicitur partim genere, partim specie, partim numero. Sic enim Aristoteles ipse distinxit. 1. Top. O sapientem & consideratū philosophum, qui nobis quisquiliis istas, etiam à P. Ramo refutatas, reponis! An nondum intelligere potuisti, vel ex alia Aristotelis ipsius puriore & veriore doctrina, quicquid enuntiaretur, generaliter, aut specialiter enuntiari? totumque hoc numeri commentum nihil esse? Tam multa enim P. Ramus tertio animadversionum, ex omnibus Græcis & Latinis auctoribus, ex Aristotele deniq; ipso tā vere cōstanterq; differuit, ut, cum hoc refugas, maximā causē tuā diffidentiam ostendas. Adde quod hoc tuum argumentum de unitate numeri, speciei, generis, valde ac vehementer tuā imperitiam vel in scholasticis ineptiis, quas solas didicisti, coarguit. Longé enim aliter apud Aristotelem 1. Top. τὰν τριῶν διαφέρου ubi res diversas comparatas inter se, facit easdem numero, specie, genere. At tu sophisticæ hujus etiam ignarus, miserè traducis Aristotelem, dum ejus de comparatione doctrinam transfers ad simplicem considerationem, & iratus queris utrum methodus artis sit una numero, specie, genere. Atque hoc tuū argumentum tam plumbeum, tam cæcum, tā turpis ignoratiæ plenū, adversus aureā illā, omnis doctrinæ, omnis philosophiæ regulā, putasti ingētem quandā machinā, qua perrumperes ac perfringeres omnia. Sed tamen hoc tuum argumentū latius exponamus. *Methodus* (ais) non est unica numero nec specie. Methodus vera in te Carpentari, nec numero, nec specie, nec genere ulla est: fa-

ARNALDI OSSATI

teor. At methodus disponendæ artis, de qua loquimur, una est in sese numero (quoniam nos ita loqui vis) nec in varias species dividua, usu tamen generalis & communis rerum omnium quæ in eam cadere possunt: sicut tota Logica una est in sese, quanvis usu generalis sit, & omnium rerū communis. sic Arithmetica, Geometria, & quælibet omnino disciplina similiter una est. Sed P. Ramus (ais) facit hujus methodi quatuor species inter se differentes, primam à generalibus ad specialia, secundam à causis ad effecta, tertiam à fine ad media, quartam à partibus ad totum. Ubinam ista methodi distributio est Carpentati? Soles tu vel minima de causa etiam contra te ipsum, locos ex libris P. Rami ad verbum citare: in hoc vero quod caput est, quod questionis summam, vel potius rem omnem continet, tu pro te ad istius divisionis probationem, ne verbum quidem citas? At quonam modo citares quod nusquam dicitur? Primū de methodo totius artis à partibus ad totum nulla usquam à P. Ramo facta mentio est. Ergo de quatuor illis generibus quartum istud, quia tuum commentum est, tibi habeto. Reliquis autem vocabulis, quæ tu in unum colligis, usus est ille quidem interdum, sed diversis in locis, nec tam sponte sua, quām necessariō, quia primum ab iis usurpata erant, pro quibus aut contra quos scribebat. Ista vero distributio, quam tu tibi singulis, nusquam est. At enim (dicas) trium reliquorum à generalibus ad specialia, à causis ad effecta, à fine ad media, una methodus esse non potest. Enimvero Logice Aristoteleæ peritissime, quid ais? Generalia (inquit Aristoteles) sunt specialium causæ, & generales ideo fines specialium etiam causæ sunt. Itaque qui à generali fine initio artis per definitionem posito progreditur ad specialia media, & omnino quomodounque à generalibus ad specialia, is à causis ad effecta progradientur. Nec si quādo P. Ramus pro methodo ab universalibus ad singularia, dixit à fine ad media aut à causis ad effecta, tria propterea methodorum genera fecit aut intellexi.

intellexit: sed his verbis unam semper & eandem methodum à generalibus ad specialia significavit: quia generalia sunt causae specialium, ut dictum est ex Aristotele. Et hunc fuisse P. Rami sensum, non solum ejus liber, sed tu ipse quoq; testis es, initio folii noni. Quare jam videmus quis sit tuus pudor, & quæ tua bona fides, cum partim ea affingas P. Ramo, quæ ab ipso nunquam scripta sunt: partim, relicta sententia, verba duntaxat auuperis. Et tamen hoc tuum de unitate numeri, speciei, generis argumentum contra Aristotelem, solum est & unicum in toto libro tuo non alienum à quæstione. Quod ipsum per se sophiticum & ridiculū est: deinde, etiam abs te non intellectum, ut jam ostendimus: tum urendacio turpi confirmatum, & falso cōmento quod P. Ramus quatuor modos differentes hujus artificiosæ methodi fecerit. Quid igitur? Aries iste quāta tibi machina adversus Aristotelem videtur fuisse? *Methodus (inquis) artis colloquide non est una numero, nec specie, quia P. Ramus quatuor ejus species fecit inter se differentes.* Imo, inquam, hæc methodus una est in se & specie, & numero: nec eam P. Ramus unquam in alias species divisit. Hic arietis tui cornua retunduntur: quin machina tota in altas fossas disturbatur & corruit: & P. Rami sententia, quod unica sit artis disponendæ methodus, per tuos impetus adhuc stabiliſ & immota permanet. Sed ab isto proprio argumen-
to, ad reliquias alieni sophismatis inceptias transcamus. Quatuordecim paginæ deinceps usque ad folium 16. nihil habent novi cōtra quæstionē, omnia sunt aut antedictorum repetitiones, aut nugæ à re proposita alienæ. Ergo præcipuas tot paginarum nugas (quis enim possit omnes?) huic homini ostendamus & exponamus. Objicit P. Ramo rationem quandam de finis anteceßione non satis idoneam. de qua jampridem P. Ramus in Logica, quod verius esset admonuit: sicuti eti de 4. Grammaticæ partibus in Grammatica, quas iste simili calumnia poulò post citabit: ut antea librum

ARNALDI OSSATI

tertium institutionum Dialecticarum, qui in dialectica post annos septem edita nullus est. At homo iste calumnia tantum delestat : ut quanvis antea bona fide pacisci se dixerit, mori tamen malit, quam bona fide quicquam agere. Debueras, Carpentari, de eo quod nunc est coram agere, non illa ab auctore emendata simiatum more repetere. Tu jampridem calumnia nescio qua proposueras decim, aut nescio quot editiones Logicorum P. Rami librorum. Postea animadvertisisti eum abs te laudatum esse, eodem argumento quo vituperare cogitabas. Nam si tot annos, tam saepe Logica illa in hac una urbe edita est, tot millia sunt discipulorum P. Rami, quot librorum millia jam inde empta fuerunt. Et tu, cum interrogareris de nescio quibus ineptiis abs te recocetis, cur tuas primas cogitationes retexeres, qui id in P. Ramo tam contumeliosè reprehenderas, quid, Academicè novitiole, quid tum respondisti? Sed ad reliqua pergamus. Folii noni pag.

2. repente Geometrarum censor & corrector factus, pro sua in mathematicis rebus singulari scientia, non vult è puncto lineam, è linea superficiem, è superficie corpus oriri. Ergo abs te, Geometra divine, in posterum postulabitur ut motu puncti ad datum punctum liceat lineam rectam dicere, motu rectæ altero puncto manente circulum describere, motu trianguli conum, parallelogrammi cylindrum, circuli sphærām constitutere. Homo ἀγωνιζεται τε qui nunquam eruditus illius pulveris arenulam attigisti, etiam audes virum in illo studio tantopere versatum hac de re appellare? Similis in verbo *Generalis* cavillatio est: Non vis Generale dici quidpiam, nisi tua prædicabilia & prædicamenta interrogantibus respondeantur, quasi verò *Genus* & *Generale* idem sit, itemque *Species* & *speciale*. At tamen Aristotelis κατηγορία, ut tertio libro animadversiorum demonstratum est, doctrinam hanc recipiunt: Et Aristotelis doctrina recipit, in isto prioris & generalioris ordine καὶ μὴ ἀντίστρεφον κατὰ τὸν τέλον αὐτολόνυμον.

Θησεις. Quin Aristoteles ipse ita loquitur, eo ipso in loco, in quo praecepit ut in tota arte ab universalibus ad singularia descendatur: ubi *universalia* vocat *communia*. Et nominatum definit *universalia* esse quae in pluribus insunt: τὰ δὲ κριθέουν ποιά (inquit) τὰ γαρ ηλεῖσιν ὑπάρχοντα, κριθέουν λέγει αὐτόν. sic qui Latiné loquuntur, *Generale* & *commune*, *Generale* & *communiter* usupant. Et tu ipse postea ignorantiae tuae judex *Generale* interpretaberis quod sit multis *commune*, ut suo loco dicam. Hic igitur, Carpentari, nihil erat quod tam graviter de P. Ramo querereris. Nunc etiam est quod tuam sive inscitiam, sive malitiam accuses ac lugeas. At tu exultas toto folio decimo, in illo tuo commēto de *Analysis* partium in totum, quod P. Ramo nimium sanè impudenter affingis, & inde opinionum varietatem in ejus doctrina incesse concludis. Neque id tibi satis est: à *simplicibus ad confusa* perversé interpretaris, & ex malitia interpretatione tua infinitam calumniandi materia trahis. At verba illa, Carpentari, non sunt P. Rami, sed Aristotelis, qui per τὰ συγκεχυμένα (cui respondet hoc verbum *confusa*, sive *composita*) intelligit *singularia*. Itaque P. Ramus in Aristotele explicando, Aristotelis more locutus pro eodem dixit *ab universalibus ad singularia*, & à *simplicibus ad confusa*, & alia quae in illa conclusione collecta sunt, propterea quod ea omnia Aristoteles usurparat. In nunc, & cum infinité mentitus sis, conclude ex tuis mendaciis (quod facis initio folii undecimi) P. Ramum velle nos progredi alias à *simplicibus ad confusa*, alias à *confusis ad enodata*: Sic enim tu & fingis, & loqueris. O hominis vanitatem incredibilem! (Quis enim hic se contineat?) Téne, Carpentari, ita esse pudoris & omnis humanitatis oblitum, ut sic palam mentiri audeas? ut famae & existimationis tuae nullam rationem habeas? An neminem tui dissimilem hæc perlecturum putas? Tamen à malitia non discedis: Pergis nugari in illo tuo *confusa*: in eoque tendiculas valde aculeatas tibi videris invenisse, sicuti jam

ARNALDI OSSATI

antea in multis aliis: quæ tamen nihil nisi tuam sophistam ostendunt. P. Ramus in variorum locorum explicatione variis nominibus uti coactus est. At in iis nullam methodi vim constituit, verborum sophismata tibi & tuis, nebularum integumenta concedit: rem intelligi vult: tricas istas verborum & apinas, quales hic perpetuo conseclaris, quantum potuit, semper aversatus est, ut etiam disputatio illa de methodo iterum atq; iterum nominatim admonet. Sed de his satis, aut etiā nimis multa: ad alia veniamus. Folio undecimo ad finem paginae primæ I. Carpentarius, quoniam agnoscit fortasse se haec tenus nugatum esse, de reconditis sapientiae suæ thesauris magnum quidpiam nobis pollicetur. Attende, inquit, quid in interpretibus Aristoteli à nobis primum sit observatum, deinde ex usu notatum in gravissimorum philosophorum scriptis.

*Quid dignum tanto feret hic promissor biatu?
Nempe quod est apud eundem poëtam,
Parturient montes nascetur ridiculus mus.*

Imo ne mus quidem nascetur. Nam hic gloriosus ostentator repente promissum obliviscitur, & ad alia omnia digreditur. Non putat in poëtis & oratoribus methodum artificiosam inesse: credo quod ipse nullam in ulla re methodum unquam intellexerit. P. Ramo jam tertio senectutem exprobrat: Desperavit quippe se eo ætatis unquam perventurum, ac perpetuo juvenis aut etiam puer esse vult. Laudat se: quid faciat, cum non habeat a quo laudetur? Fingit sibi interea, errore nescio quo, se à P. Ramo in quibusdā scriptis esse perstriatum. Ego vero, Carpentari, confirmare tibi possum, te apud P. Ramū tanti esse, ut si suspicetur tui, vel minimam, suspicionem in suis operibus posse deprehendi, nihil prius sit acturus, quam tam foedam inde maculam deleverit. Sed tamen quis istarū ineptiarū finis erit? Quando tandem tuum istud de unitate numeri, speciei, generis argumentum concludetur? Veruntamen agite: disputator iste tam vehemens & acer
hic

hic iterum de feso paulo nescio quid magnificentius sentit: Excusat se, ne quis putet tanti tamque excellentis viri majestatē imminui, quod de methodo disputet: Exclamat quæstionē de methodo maximā esse, & dignam summi philosophi præstātia. Quod sane verum est, ne quis putet hic falsa esse omnia. Est enim methodus singulare, vel cœlestē potius organum tractandarū artium, ut qui eo prædictus, sit dignissimus artū professione magister habendus sit, qui careat, indignissimus. Sed tamen hæc tibi faba euditur, Carpētari, qui tot paginis disputationis tuæ de methodo (quæ, præsertim supra quinquennium elaborata, methodicē imprimis instituenda erat) nullam methodi cognitionem, nullum ejus usum nullam logici salis micam demonstrasti.

Ludere qui nisi in campesribus abstinet armis,
 ait ille. Tu valde novitus es in hoc ludo, imo plane cœsus: Sed de tuis laudibus hæc minima fuerit, de qua etiā coges nos alio loco dicere. Addis isto loco excusationis tuæ, artem methodi esse præceptis difficilimam, quoniam P. Ramus aliter scripsit: in quo imprudens Platonem derides, qui in Philebo exercitationem methodi difficillimam omnium, artem vero minimē difficultem judicavit. οὐδὲν διηλῶσαι μὴ & πάνυ χαλεπόν, inquit: χρῆσθαι δὲ, παγχάλεπον. Derides item Aristotelem, qui hoc uno verbo rem totam complexus est, *natura prius præcedat*. Hæc sunt folio 11. Folio duodecimo mirari te dicis, quod P. Ramus methodum à judicio separaverit. Eiquid non miraris etiā, quod natura cerebrum à capite separarit? Par enim admiratio fuerit: cum P. Ramus methodum non modo judicii Logici partem, sed præstantissimam divinissimamque partem fecerit. Sed unum in una pagina cōmentum, huic homini sati non est: Itaque conduplicandum fuit. Quale enim hoc alterum est, quod P. Ramus in oratoribus & poëtis methodum artificiosam deesse fateatur? Etenim exempla artificiosæ methodi de poëtis & oratoribus deprompta, & ad ejus illustrationem in Logicis à P.

ARNALDI OSSATI

Ramo adhibita facilē hanc insignem impudentiā produnt & refellupt. Verūm qua fronte ista scribere ac divulgate audes Carpentari? quānam isthac audacia est quā in libro toties, & à tot millibus tot annos, maxima cum utilitate & voluptate perlecto docentur, ea talibus mendaciis prævertere? hæcine bona fides est qua initio paciscebaris? Sed te dimittam: Vos tantūm qui cuncte legeus hanc Carpentarii disputationem, moneo rogoque, ut nequid (nisi vestra sponte falli velitis ac decipi) de P. Ramo credatis huic homini in tot & tantis mendaciis, tam sāpe, tamque manifeste deprehensō, nisi locum peispxeritis. hæc sunt pag. 1. Pagina 2. citat, eadem veritate, Platonem in Timao, Aristotelem in organo, de duabus methodis artis & prudentiæ: qui autēores in iis locis nihil de his methodis, sed de ratione probabilitum & necessariorum, deq; generibus argumentorū, & dispositione partium unius syllogismi disputant: ut perpetuam in hoc homine Logicæ ignorantiam videamus. Sed fol. proximo, quod est decimum tertium, explicatae sunt omnes ingenii Carpentariani divitiæ, propositumque tandem aliquid immenso quinquenāii dignum labore. Methodum inventiendi invēnit: ejus partes duas facit: Priorem, quæ primūm à fine posito initio gradatim descendat, per media fini paxima, ad ea quæ ab illo sunt remotissima, quam paulo pōst vocar Analysin, & naturæ deliberantis esse dicit: Posteriorem, quæ deinde, contrario ordine, ab ultimis progrediatur, atque ab iis, per medios gradus, ad finem ascendat: hanc vocat Genesin, & naturæ jam gignentis esse putat. Quo loco (non enim amplius dissimulare possum) mirabile mihi fuit legenti & relegenti somnium illud de duabus inventionis partibus, & de natura deliberante, & gignente: obstupui, & miserabilem sophisticam istam in hoc homine deploravi. Naturæ deliberantis facit Analysin à fine summo, per media, ad infima: Naturæ agentis Genesin contrariam, ab infimis, per media, ad finem summum:

summum: & hanc utramque itionem & reditio[n]e inventionis esse vult. Recognosce, Carpentari, recognoscet tandem istum vaporis, nescio cuius, ē tuo cerebro, tam tetrico & caliginoso exhalantis fumum. Analy sis tua invenit artes omnes, deinde eas jam inventas Genesis invenit rursum, modo contrario: nec antē incipit, tuo iudicio, invenire, quām per Analysis omnia jam inventa sint. Quid hoc sophismate absurdius fingi, aut excogitari potest? Prior illa pars, quam tu vocas Analysis, est methodus illa vera & singularis, quam omnes artes, inventis partibus, & sigillatim probatis, tota universi corporis forma sequuntur. Et tu h[oc]ā methodum, de qua sola tibi disferendum esse statueras, etiam subjicis inventioni? & ultimam Logicae dispositionis partem, facis primam inventionis partem? o Logici Parisienses adfeste, hominis hujus inauditam omnibus antea seculis Logicam cognoscite. Inventionis methodus duas habet (inquit) partes, quarum prior res ignotas invenit, illo ipso ordine, quo artes jam inventae collocantur: Posterior easdem res jam prius inventas rursus invenit. Quid ridetis? Jacobus, inquam, Carpentarius, jam pridem philosophiae professor, nunc tandem medicinae doctor, versata diu multumque quaestione de methodo supra quinquennium, excogitavit tandem methodum inveniendi, qua prius artes per collocationem inveniantur, deinde earum jam inventarum inventio, tanquam ignotatum, alia rursus instituatur. Et (quod magis rideatis) exultat istam bellam duplicitis inventionis distinctionem P. Ramo ignotam esse, & ignorantia cornuti hujus elenchi putat ei causam fuisse Galeni exagitandi. Egregie vero Galenum defendit. Atqui indignatus isti patrono Galenus,

I, bibe (dixisset) purgantes pectora succos,

Quicquid ergo in tota nascitur Anticyra.

At P. Ramus Galeni causam istam multo aliter egit: laudes Galeno tantas attribuit, quantae summo alioqui philosopho doctissimo & eloquentissimo attribui posse

ARNALDI OSSATI

videbantur: omnes ejus de Logica locos vel ornavit,
 vel excusavit, vel ad regulam constantis ac ratae verita-
 tis emendavit. At tu, ut P. Rami te quam diffimillimum
 demonstres, quid agis? Damnatum publicis judiciis,
 calamitosum, senem, audacem, veteris disciplinæ con-
 temptorem, *Theſſalum*, impudentem, novum academi-
 cum, in antiquitatem contumeliosum, vetetum jura-
 tum hostem, insolentem, nugatorem, somniatorem al-
 latrando clamitas. Sed quid ego modestiam abs te re-
 quiram, qui nullum humanitatis cuiusquam sensum
 habere videaris? Perge, quid sequitur? Ad probationem
 illius tui sophismatis de bicipiti inveniendi methodo
 falso citas Aristotelis τὰ μετὰ τὰ φυσικά. Citas etiam
 quatuor illas methodos, quas in libro P. Rami som-
 niasi: At spero te jam antea ex illo insomnio excita-
 tum & experḡtūctum esse. Tandem fol. 14. mirificam
 istam rerum inventarum inventionem, initio tibi tam
 bene fundatā, concludis, per multiplicitatis (ut tuo ver-
 ba utar) distinctionem. A fine summo, per media, ad
 ima, & à generalibus ad specialia, duo repugnantia
 progressionis & collocationis genera judicas. Quid
 jam est reliquum, quod non judices & nivem atram,
 & Æthiopem album? ignem frigidum, & glaciem ca-
 lidam? Verum in illo tuo sophisme ridiculo quam
 valde tibi places? Eo Galenum antea defendisti, nunc
 eodem illo Aristoteleorū interpretum errores toto fol.
 14. & 15. defendis. At istud sophisma tam obtusum,
 tam hebes, tantum abest ut aliorum errores excusare
 possit, ut ipsum tibi auctor suu turpissimam ignomi-
 niæ notā inurat. Accedit eō quod hos interpretes pau-
 lō pōst tu ipse in eadem causa damnabis. Sed tamen
 multiplicitatis magister, quid ad quæstionem de me-
 thodo artis collocandæ tam bella ista & tam prolixa
 interpretum defensio? Age vero reliquam admirabi-
 lis hujus Logici sapientiam attendamus. Exultat ad fi-
 nē istius defensionis, & triumphat gaudio, permittitq;
 ut variis methodis, etiam in una eademque arte, uti li-
 ceat.

ceat. Cupiebam ab ipso requirere quamobrem tota disputatione sua tam dissolutus esset, nullam rem sibi proponeret initio, quæ artificiosa methodi prima laus est: nullam deinde partitionem adhiberet, quæ secunda: cur partes suo quamque loco & ordine non explicaret, quæ tertia: cur nullis transitionum vinculis partes disputationis suæ colligaret, quæ quarta: cur denique, quæ postrema laus est, nullum certum conclusio-
nis exitum judiciumque faceret: id est, cur tam confusus, tam perturbatus, omninoque tam *ἀγέθος* esset. Sed respondebit, ut video, pro multiplici jure multiplicitum suarum methodorum, se modo hac, modo illa, pro sua libidine, uti, atque abuti. O te hominem legibus tuis liberum & beatum, Carpentari! O nos servos & miseros, qui, tam studiosé & laboriosé, methodum hanc unicam & singularem, non solum in arte, sed in qualibet quæstione, quæ perspicue tractanda sit, nobis tam sancte tamque religiosé observandam & colendā proposuimus! Nunc vagare, digredere, somnia, comminiscere, turba, misce qualibet mendacia & cōmenta: methodi tam multiplices abs te inventæ laudem Logicæ & gloriam, supra, & contra methodicas Logicæ nostræ leges, comparabunt. Jam verò istam, de qua diximus, licentiam admiratio non mediocris consequitur fol. 16. Miratur enim cur P. Ramus non fecerit, ut unicam collocandæ artis methodum, sic unicam syllogismorum figuram, ut omnia nova faceret. Nova sunt huic homini & inaudita quæ apud Aristotelem maximè omnium decantata sunt. Etenim, Logice noſter, Logica Aristotelis constituit in artibus, ut unicam methodum, sic unam concludendi formā. Nihil enim vult in artium institutione nisi universaliter & generaliter affirmatum & verum. Illa est nota *κατὰ παντὸς*, decem capitibus totis, in posterioribus, ab Aristotele proposita. Quod si syllogismo concludendū fit, certe unico & unicæ figuræ modo concludi potest. Quapropter in comparationis tuæ & *πειρατὴ* & *ἄνθετος*

ARNALDI OSSATI

valde te Aristoteleæ Logicæ imperitum & ignarum ostendis.

Sed tamen tuum illum arietem tuamque illam horribilem numeri, speciei, generis machinam tandem aliquando concludamus. Haec tenus enim adversus Aristotelis demonstrationem, omni impetu, cōmotus es. Non est (ais) methodus artis unica neque numero, neque specie: Quia P. Ramus quatuor genera facit. At si P. Ramus hic aliquid offendisset, an propterea Aristotelis demonstratio imbecillior esset? Verum P. Ramus genera methodi artificiosæ diversa nulla fecit: sed Jacobus Carpenterius, pro sua sanctitate & religione, P. Ramo, hæc falso attribuit. Quinetiam Aristoteles ignorantiam Iacobi Carpenterii sibi fraudi esse negaret oportere, diceretque illum locum topici primi de numero, specie, genere, à Carpenterio non intelligi. Quamobrem Iacobe Carpenteri jamne sentis, jamne vides, quám nō dico debilis & infirma, sed quám turpis, quám fœda, quám indigna medicinæ doctore disputatione tua adversus Aristotelis demonstrationē fuerit?

Iam consideremus quid aduersus reliquam unicæ methodi à P. Ramo disputationem afferas. P. Ramus ait unicam omnis artis disponendæ methodum esse: Inducitque ad eam fidem testimonia Grammaticæ, Rhetorice, Logicæ, & cuiusvis omnino disciplinæ: nullamq; artem ait esse, quæ aliam viam unquam tentarit. Tu quid respondes huic argumento? deessene aliquid inductioni? aliquam artem non progredi ab universalibus, à generalibus, cōmunibus, ad specialia, singularia, præcipua? Quid, inquam, hic respondes? Tria fere foilia tuae disputationis extrema hic consumpta sunt, 16. 17. 18. Quæ, per Deum immortalem, qui hæc legit, studiosæ mecum cognoscite. Multa inepta & ridicula in tanta quæstione, ab hoc homine adhuc extiterunt, sed nihil adhuc tam ineptū, tam ridiculū, tamque deridendum fuit. Tria exempla adversus inductionem P. Rami, à Iacobo Carpenterio ostentantur. Hominis igitur

igitur prima primū audiamus, quomodo suas tam multiplices methodos in eadem arte interpretetur.
Vix autem (ait fol. 16.) *ut hoc ipsum quod de methodo in eadem arte varianda hoc loco contendimus, apertius intelligatur, proposito aliquo exemplo illustretur?* Equidem, Iacobe Carpentari, maximē volo & cupio, & te denique summum Logicum arbitraber, si rem tā incredibilem, tamque (ut ita loquar) impossibilem præstiteris. Age-dum igitur. *Non dicam (ais) Aristotelis Logico organo, ratiocinationis Genesin vel synthesin ex pronnatiatis, & pronuntiatorum ex simplicibus vocabus, primum explicari: deinde ejusdem ut generis universi, Analyseis, vel diæresis in Apodicticam, dialekticam, & sophisticam.* Quod quanquam id probabiliter dicatur à multis, se qui tamen nō placeat hoc tempore, quoniam à te jampridem explosum est, & mihi, ut libere dicam quod sentio, non fuis probatum. Hæc tua est oratio, hæc tua verba sunt, Iacobe Carpentari, folio illo 16. quem ego locum legi saepius & relegi, vixque meis oculis credidi, hominem quenquam sui tam oblitum, tamque immemorem fieri posse. Paulò anté, quatuor totis paginis, errorem interpretum Aristotelicorum, de methodo Logici organi tam confusi, acerrimē, & in P. Ramum contumeliosissimē defenderas, quem nunc re ipsa coactus condemnasti. Equidem, quoquo animo egeris, magnam tibi gratiam debeo habeoque, non solum, quod organi Logici tantam confusionem, quantam P. Ramus libris animadversionum demonstravit, tu tua testificatione, sententia, auctoritate condemnes: sed multo magis quod Logicae artis exemplū multititudini tuarum methodorū convenire non putas. Ergo P. Rami inductio de unica artis methodo adhuc per te salva est. Sed enim exemplum secundū proferetur, quo, scilicet, subvertetur inductio, in quo non tantum à generalibus deorsum ad specialia descendetur, sed etiam sursum versus ascendetur. Ergo secundū illud exemplum tā varijs methodis variatū & coloratū abs te, Iacobe Carpentari, audiamus. Nullum exem-

ARNALDI OSSATI

plum affers: sed interrogas P. Ramū, quanam methodo physicam sit expositurus: & tibi ipsi, discipulus pro doctore, respondes ipsum à materia & forma ad physicum corpus iturum, quæ est tibi Analysis. Ita tuo iudicio P. Rami physica duas methodos habebit, Genesin & Analysis. Atqui si tibi à P. Ramo precarium exemplum concederetur, tamen nihil esset contra quæstionem, si corpus physicum initio (ut hæc methodus exigit) definitum distribueretur primum in materiam & formam, quales in omnibus attibus innumerabiles partitiones sunt integrorum in partes: deinde divideretur in species. Esset enim progressio totius artis nihilominus à generalibus & cōmunitibus ad specialia. Corporis enim physici definitio generalior esset: & in eodem ipso loco distributio in partes ordinē nihil mutarer, non magis quam si dices, præposito definito ante definitionē, Analysis mutari: forma enim artis ex totius corporis habitu spectāda est, nō ex unguiculo aliquo definienda. Verum enim vero, beatissime Logice, si verū à P. Ramo perdiscere, quām in ista ludibria præceps ire maluisses, didicisse, vel ex Aristotelis Logica, nihil in arte constituendū esse nisi $\chi\varphi\theta' \alpha\nu\rho'$: neq; ideo causæ cuiusquam mētionē potius in arte physica, quām generis & speciei, quām syllogismivel methodi, quām cuiusquam deniq; Logici præcepti faciēdā esse. Itaq; solus & tecū, & sine tuo (ut dicunt) hospite ratiocinatus, frustra tibi has rationes deputasti. P. Ramus collocabit in physica, quæ physicæ propria erunt: neq; ab eo Analysis Genesi, vel Genesim Analysis ulla miscebitur, ut tu permiscevis. teque, si tibi tandem aliquēdo cōsulere velis, multis in hac doctrina, & falsis opinionibus liberabit. Debet ei studiosa sýnceritoris doctrinæ juvētus Grāmaticā, Rhetoriciā, Logicā: cæteras liberales artes (deo favente) debebit. Quare si comitiali illo morbo tandem percuratus Latinis & Græcis literis te dedideris, si disciplinas ex sua veritate, utilitate, dignitate colueris, tot & tantas

ei laudes attribues aliquando, quot & quantas contumelias, libello isto tuo & antea alio nescio quo, in eum evomuisti. Sed hoc secundum exemplum contra inductionem P. Rami, quid methodorum tuarum multitudinem adjuvat? Aristoteles ait à generalibus ad specialia in omni arte progrediendum: idque praeceptum in physica philosophia constituit, & ita sane progreditur. Tu, homo methodorum insomnis μεθοδικώτατε, Aristotelii vim afferre vis, & nomine P. Rami, non solum in præcepto verissimo, sed in exemplo clarissimo & illustrissimo condemnare? Ergo P. Rami inductio, per duo antecedentia tuæ disputationis exēpla, adhuc integra est. Ecquonam tandem tertio exemplo demonstrabis, artem totā aliquam non à generalibus ad specialia progredi? Evidem, quia modestiam mihi contra mores tuos proposui, nolo ego de te gravius quippiam dicere: sed tantum cupio hoc loco Logicos, ad quos ista questio pervenerit, in tertio tuo exemplo attentos esse. Omnes artes, Grammatica, Rhetorica, Logica, Arithmetica, Geometria, & quævis liberalis denique & ingenua disciplina, testes pené manu adducuntur à P. Rami, ut judicetur ex earum sententia ac voluntate, quæ methodus illis oportunissima & commodissima videatur. voce una omnes respondent, à generalibus ad specialia se velle progredi. Iacobus Carpenterius negat, & exemplū artis alicuius testimoniumq; contrariū pollicetur. Tentarat primū in Logica Aristotelis testimonium illis contrariū: sed conscientia nescio qua motus, artem illam testem producere erubuit: imo tanquam sibi contrariam, ad P. Ramum remisit. Physicam deinde testem produxit, sed falsum ipsi testimonium imposuit, & ab ipso physico philosopho repudiatum. Quid ergo? quænam tandem ars Carpenterio testis, contra unicam P. Rami methodum, aderit? Grammaticane an Rhetorica? minime, artes enim illas ut methodi expertes despicit. Logicane? antea jam, ut suspecta, in P. Rami subsellia concedere

ARNALDI OSSATI

jussa est. vtrum de mathematicis aliqua? hæ disciplinæ sunt huic homini peregrinæ & barbaræ. Quænam igitur tandem ars ista fuerit? Cogitate stuporis genus quamlibet novum & inauditum: vincam tamen cogitationem vestram. Adversus omnes artes ingenuas & liberales unica & singulari via progredientes, citatur à Iacobo Carpentario, Iacobi Carpentarii compendium dialecticæ, multis methodis intet se pugnantibus constructum, Analysi à definitione suprema ad infima, Genesi à primis elementis ad maxima, O stultum Platonem! o delirum Aristotelem! o P. Ramum simplicem plebejos istos autores secutum, frustraque illi suæ artium inductioni & testificationi tantopere confisum! Etenim valeat jam authoritas omnium artium liberalium & ingenuarum, & tota illarum inducção corruat & jaceat necesse est, productio dialectici nostri de dialectica cōpendio. Veruntamen heus Iacobe Carpentarii, per Deum immortalem, quid hic cogitasti? Si de tribus capellis, imo de lana caprina, tibi lis esset, quo ore apud judicem auderes & pro teipso, & à teipso testimonium afferre? Quæstio jam est omnium, quæ unquam extiterunt in disciplinis (quia de ipsarum forma, & tanquam anima agitur) maxima gravissimaque, maximæ grauissimæque inductionis argumento per P. Ramum confirmata: & tu hanc tibi videris contra maximè gravissimeque refutasse, si testimonium tuum confidenter opposueris? Artes omnes liberales ajunt sc̄e à generalibus & universalibus ad specialia progressi: Iacobus Carpentarius negat, quia Iacobi Carpentarii compendium secus procedat. Ergo, homo humanitatis expers, tuam unius levitatem & stultitiam omnium artū auctoritati sapientiæque antepones? Quid si etiam tuum hoc tanti tibi ponderis testimoniū à te improbatum antea & damnatum sit, quid fronte ista tua fiet? Agedum legatur istud tuum compendium, & conferatur cum prima illa organi Logici methodo à teipso improbata & damnata, quid methodus illa interpre-

interpretum á tui compendii methodo differet? certe nihil: nisi quod tu definis initio dialecticam, in eoque P. Rami methodum contra interpretes sequeris. Expectasne igitur, ut concludam tertium istud tuum exemplum nihil jam contra P. Rami inductionem facere? Quis non videt eo modo contrá nihil effici, sed etiam tuam insigne temeritatem convinci? Sed mitificam tuam in isto compendio methodum solam, ceteris rerum sophisinatis omissis, paululum consideremus. Definitionis & divisionis doctrinam doctrinæ prædicamentorum anteponis valde inscienter & imperite, cum definitionis & divisionis doctrinam putas ē prædicamentis oriri. Hæc prima laus est in tua methodo. Deinde post doctrinam enuntiationis & syllogismi, quæ ad dispositionem pertinet, rursus inventionem confundis, & quidē contra Aristotelis organi ordinem: quia dialectici syllogismi tuam inventionem præponis syllogismi apodictici inuentioni, cum in organo postponatur. Ita belli tui compendii & initio & extremo collocasti inventionem, quæ natura prima erat, & animal quoddam nobis pinxisti, cuius caput à pedibus nihil differret, ut interim omittam inventionem, cum generalis sit, generaliter & semel docendam fuisse. Atque in glorioſo isto tantæ & tam incredibilis inertiae compendio valde miratus sum, cum prædicetur abs te ut absoluta quædam Logicæ methodi idea, atque ut exemplum singulare & omnium artium exemplis antependum: in hoc, inquam, compendio valde miratus sum, nullam proſus ipsius methodi mentionē fieri: & eam partem, quam tu ipſe Logicæ maximam, tua ista disputatione, & nobilissimam judicas, abs te prætermitti. Gloriaris te Logicam artem descripſisse: & tamen quod existimas absolutissimum & perfectissimum, id in ea totum est omissum. Cogita, quæſo, qui sit hic elenches, & quo nomine appellandus: verba expositioni meæ defūnt, rem ex suo momento ponderato. Reliquos errores hujus compendii, & aliorum

ARNALDI OSSATI

scriptorum tuorum plurimos & maximos exponā tibi
aliás copiosiús. Constitui enim, cūm studiis gravibus,
& seriis defessus animus dare se jucunditati volet, tum
ridendi gratia, ridicula sophismata tua pervolutare,
eademque hoc expositionis genere illustrare: cujus ob-
lectationis socios & participes habebo plurimos ē P.
Rami ludo atque disciplina (sunt enim longē plures a-
pud omnes gentes & nationes, quām tibi ac tuis simi-
libus videatur: sed de familiaribus tantum loquit) qui
certatim mecum efficient, ut quantum tu tibi haētenus
placuisti, tantū , patefacta inscitia & stultitia tua, &
tibi & aliis omnibus in posterum displiceas. Emitte in-
terim istos in Alcinoum cōmentarios, quos per hoc e-
gregium specimen nobis ostentas . Hui quam bellos
oportet eos esse! si tamen ulli sunt. Næ ego, si quando
exierint, ita tibi illos depexos, ita exornatos dabo, ut
si quid in hac eorum particula prætermissum sit, id in
toto opere à me largissinē cōpēsatum esse cognoscas.
Emitte præterea cōmentarium istud descriptionis Lo-
gicæ, quod nobis minitaris. Nam quæ haētenus edi-
disti, ea omnia proximis Bacchanalibus, dum intem-
perantes in voluptate bacchabuntur, à nobis expounen-
tur. Nunc præclaræ hujus disputationis tuae expositi-
onem persequamur, & videamus, in producendo isto
tuo aureolo compendiolo, quantam nobis laudū tua-
rum materiam præbueris. Pagina secunda folii decimi
sexti, dicis in cōpendiis (quæ, ut scis, rudibus proponi
solent) necessariō à definitione incipiendum esse, ad
hominum studia excitanda. deinde pag. proxima (quæ
est prima folii 15.) mentis & memoriae impotentia ne-
scio qua, claré & perspicuē dicis, cūm volumus rudes
instituere, atq; hos à primis artis elementis ad id quod
habet summū quasi manu ducere, nihil esse necesse à
definitione icipere: quod verēdū sit ne definitione initi-
tiō posita deterreātur ac desperatione debilitetur. hæc
tua, & tuorū verborū incredibilis pugna tecū est. Hei
mīhi, quale animal, & quām indocile doceadū suscepit

Definitio

Definitio (ais) *rudibus initio proponenda est*: Definitio (ais idem) *rudibus initio proponenda non est*. Item *Definitio initio posita excitat*: *Definitio initio posita deterret, & desperatione debilitat*. Dissolve ænigma Oedipe, & responde bipedisne, an quadrupedis animalis existimari debeat; et de tot methodis tuis unam aliquā, quæ te hinc expediatur, adhibeto. Quid deinde, nihilne est præterea? imo amplius. Nā hic magister ruit semper in pejus, ut mox videbimus. Ordo, ratio, & modus cūm alii in rebus omnib⁹, tū verò in studiis tātūm possunt, ut qui hæc teneat, tantūm ferē, quantum velit, efficiat: qui non teneat, frustra se cruciando nihil proorsus efficere queat. Itaque de ratione studii, & de institutione juventutis, multa volumina à multis conscripta sunt. Iacobus Carpenterius, qui illa non probat, nunc tandem ex sua sententia hac de re præcipit, & rem tantā uno verbo expedit. *Rudes* (inquit) *in ipsis artium elementis sic erunt exercendi ut neſciant quæ inſtituti ſumma ſit*: tum (quod nunquam alias ſolet) ad hujus oraculi explicationem, addit paulo pōſt exemplum, & quidē ex ſeipſo petiū, ut ante de cōpendio: ac dicit ſe puerum Grāmaticam, adolescentem Logicam ſic didicisse, *ut omnino neſciret* (inquit) *quō magiſtrorum in docendo ſuus in diſcendo labor reſerretur*. En Carpenterii, & ſimilium ſophistarū methodum & ordinem: en studiorum rationem & modum: o literas! o artes! magister inauditæ fatuitatis, quæ vertigo mentis te impulit, ut hæc ſcriberes? imo etiam ut divulgares ac venditares? mirabar unde tibi tanta cūm doctrinæ, tum judicij inopia: Nunc cum te iſto modo institutum eſſe glorierteſ, non jam miror amplius. Et tu, ut didicisti, & ut docendum eſſe præcipis, ita etiam doceſ: nonne? Egregiam verō Reipub. operam navas. Huc, huc omnes, qui bonarum artium ſtudio tenemini, huc undique ſine mora concurrite: Iacobo Carpenterio vos in disciplinā tradite. hic vos ſic docebit, ut neque quid ipſe ſibi velit, neque quid vos agatis, intellegere poſſitis. Sed nullus unquam finis erit, ſi ſingula

ARNALDI OSSATI

persequamur : strictim igitur reliqua dicamus. Audet Iacobus Carpenterius P. Rami dialecticam ad suarum methodorum hysterologiā aggregare. at quoisque tandem hominis hujus hæc tanta prorumpet audacia ? In nomine Dialecticæ revocat ineptias tā multis ex Aristotele ipso sumptis testimoniis à P. Ramo explosas, quinetiam ab ipso Carpenterio , belli sui compendioli initio, rejectas, ubi, nomine Dialecticæ, Apodicticam etiā cōprehendere se interpretatur . Has tu fordes sophisticas & superiores his maiores, si in nostroru aliquo, Carpenteri, deprehendisses, papæ, quales & quantas asini auriculas ipsi appingeres ! Offendis & titubas ad eosdem scopulos duarum cōtriariorū methodorum in eandē artem cadentium, repetēdo ac permiscendo antē dictorum plurima, quæ prætero ne tua vitia videar imitari. Ad extremū excusare iterū vis Galenū, vel potius in mentienda Galeni excusatione P. Ramū accusare : Sed jam antea lectors admonui, ut locos cōferant: nuncque iterum moneo, ut hoc tuum mendacium ex reipsa deprehendant.

Hactenus de duabus mihi propositis initio partibus altera satis superque disceptata est, nihil esse in tota disputatione Carpenterii contra unicum artium collaudarum methodum, nihil Aristoteli demonstrationē, nihil P. Rami inductionem istius calumniis infirmari. Pars reliqua disputationis meæ mihi supereft, à Iacobo Carpenterio unicum artium methodum & singularē cōprobari, gladiatoremque istum importunū suo ipsius gladio jugulari. Quæ pars, quia mihi ab ejus ludificationibus libera est, breviter ac perspicue concludetur. Hic igitur qui oculis & corporibus adestis, mentibus ac judiciis adeste. Rem magnā polliceor, sed tamen verā. Iacobus Carpenterius ad finē folii 17. disputationis suæ, ait de duarum suarū methodorum Geneseos & Analyseos confusione. Atque etiam illud addo, dum singulos gradus in Analysi, vel Genesi persequemur, si quid in illis occurrat, quod generale sit, & suapte natura commune multis:

multis: id ita esse explicandum, ut Analyticē semper à generalibus ad specialia descendamus. Hæc syllogismi nostri abs te, Carpentari, propositio est: ubi nunc tandem pro P. Ramo contra te ipsum, quid sit generale verē & cōmodē interpretatis, quod suapte natura sit commune multis: id quod antea te facturum esse prædixeram . Assumptio repetatur ab Aristotele. Atqui tria tota Aristotelis capita, septimum, octavum, nonum primi posteriorum præcipue istam materiæ artificiosæ συγγένειαν διδούσαν demonstrant: ut sit artis universæ materia pené tanquam categoria unica, quæ complectatur γενετικά ταῦ, ὑπόλητα, ἐπικέτατα: ἐπεργήσις autem in arte nihil sit: Arithmeticum in Geometria esse ἀγεωμέτρικην, & Geometricum in Arithmeticæ & ratiocinat. Hæc Aristotelis, de tribus artificiosæ materiæ notis, secunda nota est καθ' αὐτ. Sub eodem genere (ait) omnia artis ejusdem propria cōprehenduntur ἡ ἀτλῶσ, ἡ πῆ, aut absolutæ aut modo quodā: Absolutæ, ut species & differentiæ: modo quodam, ut proprietates. Hæc Aristotelis, Iacobe Carpentari, ad propositionē tuæ confessio- nis maxima illa & verissima Logicæ velut oracula sunt nobis assumpta. Quoties (ais) generalia occurrit in arte & suapte natura cōmunia, semper à generalibus ad specialia progrediendū est. At Aristoteles assunit, & ait in arte perpetuum id esse: omnia generali aliquo & cōmuni cōprehendi. Conclude igitur , Dialecticæ magister, & summā ratiocinationis confice, Quare in omni arte semper à generalibus ad specialia est descēden- dum. Hæc palinodia tui stuporis conscientia , valde tibi turpis est: turpior tamen est etiā altera. Fol. 14. pag. 1. ex Aristotelis illa tam decantata demonstratione , *Magnum (ais) in docendo vitium est, s̄epius idem dicere: Hoc verō effugere nemo potest, nisi hac methodo à maxime cōmunibus ad ea quæ in specialibus im̄sunt, per intermedie proficiatur.* Hæc verba sunt Iacobi Carpentarii ad- verlus P. Ramū differentis non esse unicā methodum à generalibus ad specialia, & verba tamen, quibus ite-

ARNALDI OSSATI

rum pro generalibus dicit maximē cōmunia. Evidēm non arbitror scientem & prudentem Iacobū Carpentarium hæc cōmentatum esse , aut sua manu descripsisse; sed vi veritatis,oppresso,coactōq;,nec quid cogaret,aut scriberet attento verba ista excidisse. A generalibus id est maximē cōmunib⁹ (ut ipse nobis,& pro nobis contra seipsum interpretatur) per intermedia ad specialia proficiscendum est:secus maximum Tautologiæ vitium evitari non potest . Ergo Aristoteles, Aristotelisque demonstratio à Iacobo Carpentario re ipsa tandem defenditur : Ergo P. Ramus Aristotelem secutus à Iacobo Carpentario collaudatur,& unica artium methodus tandem asseritur : secus ait hic noster methodicus Tautologiam fœdam fore. Hæc te, Iacob⁹ Carpentari , altera tam infamis palinodia , hæc te inconstantissima, si ullam partem sensus habes,lacerat & cruentat oratio . Quamobrem respice te:hanc verā & rectam methodum quā imprudens nunc tandem asseristi,tu posthac prudens ac sciens tene:istas alias falsas & præposteras declina,vita,fuge. Tu medicinæ doctor appellari vis : parumque interea cōsideras,ista tua methodorum multitudine & confusione , quam tibi miseriæ telam contexas. Nam sive sursum, sive deorsum progrediare,tibi Genesis, aut Analysis est . Denique quemcunque ægrotum , & quocunque modo curaveris,artificiosa quædam methodus tibi est. salubre, insabre medicamentum dederis, remedium, venenum: nihil tua intererit: sanaveris, necaveris, methodorū tuarum aliqua fuerit. At si fama hæc de te semel in vulgo exeat, quis, vel desperatus, ægrotus tali medico se commissurus videatur ?
Sed opera jam nimium in dedocendo hoc homine nobis consumptum est. Vos in Parisiensi Academia, doctissimi & eruditissimi medicinæ doctores , huc appello: vestram hic,ut inquit ille,

Clamo, postulo, obsecro, oro, ploro, imploro fidem
adeste, cognoscite, animadvertisite quæ res in hac con-
troversia

troversia versetur. De methodo ordinandæ, collocadæ, exercēdæ etiam artis cuiusvis ac disciplinæ agitur: quo genere gloria imprimis vestræ professionis continetur. Methodus in Grāmatica, aut Rhetorica nulla sit: gravis culpa nequaquam videatur, ut hic tantum barbaria vel infantia linguae derideri possit. Methodus in aliquo magistri Logici cōmentario nulla sit: ignorantia purioris philosophiæ, & Logici usus imperitia, elenches denique sophisticus despicitur. At una medicinæ doctrina si perversé & præpostérē doceatur & exerceatur, culpa ista non risu, non despectu traducitur, sed lugetur & deploratur morte hominū & interitu. Disputationis plerunque theses physicas publicis scholæ vestræ disputationibus, imo physicæ medullam non minús copiosē & eleganter, quam accuratē & graviter tractatis. Hanc thesim de unica artis methodo, per sacras Apollinis musas, disceptatione & judicio scholæ vestræ, ut est, ita dignā judicate. P. Ram⁹ præceptor meus unicam esse demonstravit, à generalibus ad specialia, argumento Aristotelis de intelligentia, & memoria permagno, testimonio artium omnium amplissimo. Iacobus Carpenterius multis probris & calumniis in eum invehitur: rationis & animi inopia & impotentia est. Rebus alienis & falsis abutitur, primū quod Analysis, Genesīs, synthēsis, diæresis tripliciter dicatur, id est omnes viæ non solum rectæ, sed etiam inversæ ac tortuosæ methodi nomine comprobentur, sic ut nulla quid libet confundendi stultitia non sit ei methodica: deinde quod P. Ramus omiserit methodum artium inveniendarum. Sophisticæ hic copia & potentia est, comminisci quidvis & configere, non veris & propriis argumentis contra causam agere. atque hæc disputationis pars omnino dimidia. Reliqua dimidia pars duobus illis argumentis Aristotelis & P. Rami, duo argumenta opposuit: alterum falsum atque etiam ab argumentatore suo non intellectum, quod methodus doctrinæ non sit unica, neque numero, neque spe-

ARNALDI OSSATI

etie: alterum παραδεξώσατον, quod cento omni genere sophismatis consutus, a suo etiam interpolatore improbatuſ, tamen auctoritate testimonii & pondere aduersus omnium artium splendorem & dignitatē comparetur. Denique accusator ipſe theſim de unica artis methodo tam indignis modis accusatam, tandem testimonio ſuo dupliſi conſirmatam vindicavit. Sed tamen non poſtulo ut propterea urna moveatur, vel eatur in conſilium, ſententiaque de tanta re ſecundum hæc argumenta proferatur: ampliate potius judicium, patronos intelligentiores & vigilantiores advocate, theſim denique diſputationibus vestrīs proponite: & acerrimis ingeniis (cujusmodi in veftro collegio, id est in Academiæ Parisiensis ſplendore ſummo, tam multa ſunt) expedite, modisque omnibus diſcepcione quaſiaam ſit illa prima demonstratio de lumine intelligentiæ & memoriae, ite hæc altera de artium omnium in unicam methodum conſenſione & conſpiracione: proque prätantissimi ordinis eximia ſapientia perficie, ut dogmatis ad omnis doctrinæ, ſed vestræ imprimis, iſtitutionem & uſum tam singularis, tamque divini perfectio vobis & abſolutio debeatū.

F I N I S.

BC